

Nukić Abdulah, geod. inž.



U Travniku, gradu u kome je proveo većinu života, iznenada je prestalo da kuca srce Abdulaha Nukića. Preminuo je 14.08.2021. godine. Kolega Abdulah Nukić je bio izvrstan stručnjak i dobar kolega. Nastojao je svakom poznaniku u svim životnim situacijama biti pravi i iskreni prijatelj. Krasile su ga najljepše ljudske vrline tako da je svaki trenutak proveden u njegovom društvu bio prilika za sticanje novih, i životnih i stručnih savjeta, i uputstava. Posebno se isticao u prenošenju svog dugogodišnjeg geodetskog iskustva na mlađe kolege.

Bogato geodetsko iskustvo je stekao radeći na poslovima inženjerske geodezije kao i na poslovima održavanja katastarskog operata i operata zemljišne knjige.

Ukopan je u Travniku na groblju Kupilo – Bašbunar, toplog ponedjeljka 15.08.2021. godine.

Nukić Abdulah je rođen u Tuzli u naselju Tupkovići 1942. godine. Završio je dva razreda gimnazije u Tuzli, a poslije toga se upisao i uspješno završio Geodetsku tehničku školu u Tuzli 1967. godine. Poslije završetka srednje škole, zapošljava se u Građevinsko preduzeće Bosna u Sarajevu gdje radi na poslovima inženjerske geodezije. Obzirom da je GP Bosna izvodilo građevinske radove širom nekadašnje Jugoslavije, Abdulah Nukić je vodio poslove na izgradnji dionice pruge od Beograda do Bara. GP Bosna je počela sa izgradnjom nekadašnjeg hotela Lipa i zgrada Zvijezde u Travniku. U svrhu izvođenja geodetskih radova na pomenutim objektima kolega Abdulah, kao zaposlenik preduzeća GP Bosna dolazi u Travnik 1971. godine.

Uz rad nastavlja dalje obrazovanje i upisuje Višu geodetsku školu u Sarajevu. Uspješno je završava 1976. godine i stiče zvanje geodetskog inženjera.

U općinu Travnik se zapošljava 1977. godine gdje radi na poslovima održavanja katastarskog operata i operata zemljišne knjige za općine Travnik i Novi Travnik. U redove Armije Bosne i Hercegovine je stupio 1992 godine i ostao do 1995. godine kada se vraća na radno mjesto u općini Travnik.

U penziju je otišao 2000. godine, ali je zbog velikog nedostatka geodetskog kadra prekinuo penziju i počeo raditi u Kantonalnoj upravi za šumarstvo Srednjobosanskog kantona u Travniku gdje ostaje do odlaska u penziju. U zasluženu penziju je otišao 2010. godine.

Skladan porodični život je proveo sa suprugom Advijom sa kojom je imao dvije kćerke Arminu i Aidu.

Smrću kolega Abdulaha, geodetska struka, kolege i prijatelji su pretrpjeli ogroman gubitak jer je kolega Abdulah bio vrstan geodet, a prvenstveno čovjek velike duše.

Jusuf Topoljak